



partii naleraq

Nuuk, 4. maj 2015

Hans Enoksen

**UPA2015/113**

**Hjemme dialyse Nunatsinni atorreqarsinnaanersoq misissoqqullugu, tamannalu anguniarlugu Naalakkersuisut kingusinnerpaamik UPA 2016-imut Inatsisartunut innersuussillutik saqqummiussassamik suliaqaqqullugit Inatsisartut aalajangiiffigisassaattut siunnersuut.**

(Inatsisartunut Ilaasortaq Mimi Karlsen, Inuit Ataqtigiit)

### **Siullermeerneqarnera**

Inatsisartunut ilaasortaq Mimi Karlsen Inuit ataqtigiit siunnersuuteqarpoq nunatsinni angerlarsimaffimmi aammik akuluiartittarneq pillugu Naalakkersuisut misissueqqullugit, tamannalu Partii Naleqqamiit oqaaseqarfigissavarput.

Napparsimasortatta nunatsinni katsorsartittarnissaat tamakkiisumik ingerlanneqassasoq qularnangilaq tamatta kissaatigaarput, tassami napparsimasumut ilaqutaanullu toqqissisimanarnerpaajuvoq, avatangiisit inooriaaseq sungiusimasat atorlugit, nunagisarlu qimannagu katsorsarneqarneq minnerunngitsumillu napparsimasumut nukissaqartitsilluartartoq, tassalu ilaquttanik toqqissinartumik najorneqarluni napparsimalluni katsorsaaneqarneq katsorsarnerlu ingerlanneqartarpat.

Tartukkut nappaateqartut nunatsinni ilaasa katsorsarneqarsinnaanngorsimanagerat qujamasuutigaarput, tassami napparsimasut ilaquttatik ilagalugit angerlarsimaffimminni katsorsarneqarnissamut ikiorneqarnissamullu napparsimasut ilaannut periarfissaqalersimammat, tamannalu napparsimasumut ilaqutaanullu pitsaanerulerlunilu toqqissisimanarnerulersimassasoq takoorloorparput.

Neriunniartalu suli siunissami katsorsaanermi periarfissat pitsanngoriartuinnassasut, tartumikkullu nappaatillit tamarmik tamakkiisumik ikiorneqarsinnaanngortillugit nunatsinni.

Tartumikkut nappaatillit nappaammik sakkortunerusunik atugallit ikiorneqarsinnaanerit nunatsinni siunissami aamma aqutissiunniartariaqartoq Partii Naleqqamiit isumaqarpugut, soorunami tamanna pissutsit periarfissallu napparsimasumut katsorsaaniissamut tunngavissat ajornartinnigippassuk anguniartariaqarmat.

Naalakkersuisut akissumminni tunngavilersuutigisaat paasilluarparput, tassalu katsorsaaneq nappaammik sakkortunerusumik atuisunut ingerlanneqassappat taava nakorsat peqqissaasullu immikkut ilisimasallit atajuartumik najuuttarnissaat pisariaqartinneqartoq.

Kiisalu aamma atortutigut malinnaajuarnissaq sulisullu katsorsaariaatsimi ilisimasaqarluartut pigiinnarnissaat anguneqassappat napparsimasut ikinnerpaamik 8-nut amerlassuseqarnissaat, tassalu katsorsaaneq eqqunneqassappat tunngavilersuutigineqartoq paasilluarparput naak kissaatiginarluinnaraluartoq aamma taakku tartumikkut sakkortunerusumik nappaatillit nunatsinni katsorsarneqarsinnaanerisa ingerlanneqarsinnaanerit, tamannalu pisinnaangitsoq massakkuugallartoq paasissutissat Naalakkersuisunit akissutigineqartut tusaatissat tiguagut.

Aammalu peqqissutsimut aqutisisoqarfiup aammik akuluiaanermi ineriartorneq malinnaaffigeqqullugu piunasaqarfigineqarnera paasilluarlugu, neriutigalugulu pissutsit siunissami tartumikkut nappaammik eqqorneqarsimasunut katsorsaasarnert pitsaanerulissasut

Tusaatissat tigullugu Naalakkersuisut innersuussutaat isumaqatigalugu oqaatigissavarput.